

Date – 01/11/2024

Time - 18:30 -18:40Hrs

REGIONAL NEWS BULLETIN

HEADLINES (EVENING)

1. Chief Minister Pu Lalduhoma'n Bana-kaih Policy hnuaiiah Mizoramin bung thar a kai dawn a ni, a ti.
2. Nikum chung a Mizoram pawn atanga sa, bawngnhute leh artui chawkluh chu cheng vaibelchhe 101 hu vel a tling.
3. Kumin thla 10 kalta chung khan excise & narcotics department hnathawkte chuan heroin kg. 39 leh gram 18 bakah methamphetamine kg. 122 leh gram 435 an man.
4. Rel ticket lak lawk theih hun chung tih danglam a ni.

<><><>

HAND HOLDING

Chief Minister Pu Lalduhoma'n Bana-kaih Policy hnuaiiah Mizoramin bung thar a kai dawn a ni, a ti.

He thu hi vawiina Aijal Club-a Bana-kaih policy leh National Livestock Mission scheme kaihkawp a nih tan hawanna hunah sawiin, Pu Lalduhoma chuan tun hma lama Mizoram a sorkarna changtu party-te'n a an thil kalpui thin chu sem policy a nih thu leh sem 'era' atanga thawhrimna 'era' a Mizoram a luh tur a sawi a. Political party thenkhatte'n sum an sem thin chu mitin huapzo ni lova an party mi leh sa te duhsakna atana an hman thin thu sawiin, a hnu leh inthlanna-ah party dangin sorkarna an chan chuan sorkar hmasa ai a sum an sem tam tur thu sawi lehin chutiang boruak chuan Mizoram chu kum 40 chuang teh meuh a tuam tawh thu a sawi a. Mizoram mipuite rilru chu a painsual nasat tawh thu sawiin chuta tanga policy thar thawhrimna policy ken chu a hahthlak hle a ni, a ti.

Chief Minister chuan thawhrimna policy chu kum tam tak an vahvaihpui thu leh Mizoram mipui retheihna chuan sem lam a awn thu sawiin inthlanpui hnukung berah erawh mipuite'n an vote hmangin sem policy chu an vuilam ta a ni, a ti.

Pu Lalduhoma chuan Mizoram chu kalphung thar hnuai-ah thawhrim, taimak leh tih tak takna hnuaiiah a lut chho mek ni a sawiin Mizoramin archaw leh vawkwaw ringawt a lakluhna a sum kal zat chu cheng vaibelchhe 77 chuang a nih thu a sawi a, kel pawh metric tonn 49 lakluh a nih thu a sawi bawk.

Chief Minister chuan Covid-19 leh African Swine Flu tuartu nasa ber department chu Vety Department-a nih thu sawiin chumi atanga chhanchhuah an nih leh theihna'n Hand Holding Policy leh National Livestock Mission chu kalkawp tir a nih tak thu a sawi a. He hmalakna hnuaiiah hian a hmasa ber atan Mizoram chu

intodelh tir phawt a, chu chuan Mizoram pawna thawn chhuah theih hial turin hmasawna a thlen a beisei thu a sawi bawk.

Ran vulh a intodelh tura hmalakna kawngah sa sawngbawl (meat processing) lam pawh kan ngaihtuah thlen a ngaih thu Pu Lalduhoma chuan a sawi a. Sa sawngbawlina industry hi ‘bana-kaih’ hnuai-ah an telh thar dawn niin a sawi a. Thalai, hetiang lama theihna neite tan remchang a inhawng dawn a ni, a ti a. Ranvulhtute tan Animal Insurance scheme tha tak neih a ngai a. NLM hnuaiia Animal Insurance Scheme kalpui thinah state sawrkar sum thawh tur hi za a sawmthum a ni thin a. Mizoram ang state pachhe tan chuan a sang lutuk a, an tlin ngang lova. Central sawrkarah min tihniamsak tura an ngen thu leh tunah chuan za a sawmah an rawn tihniam ta a ni, a ti.

National Livestock Missions hi vawkpui vulh te, kel vulh te, ar awpkeuna leh ranchaw siamna lam te a lian tham taka hmalakna tur ruahmanna a ni a. Tanpuina sum pawh a tam tham hle. Tunah hian India hmarchhak state zingah Mizoram chu NLM a ti tha ber niin, he ruahmanna kaltlang hian mi 76 in loan an la tawh a, mi 31 in subsidy an hmu tawh a, mi 21 lai mai subsidy hmu leh tura peih fel an nih thu sorkar hotute chuan an sawi.

<><><>

ELECTIONEERING

Kar leh Thawhlehi a vote thlak tur, bial 12 awmna Sinlung Hills Council inthlanna atana political party leh candidate-te vote zawn beihpui chuan a vawrtawp a thleng chho mek.

Sinlung Hills Council bial 12 zinga bial 6 hi Aizawl district-ah a awm a, bial 4 chu Saitual district-ah awmin bial 2 chu Kolasib district-ah a awm thung a. Sinlung Hills Council inthlan vawi 2-na lo awm tura chuh tum mi 50 te’n endikna an paltlang a, BJP candidate 2 zinga candidate pakhat zawk a inhnudawh leh avangin candidate hi 49 an awm ta a ni. He inthlan lo awm turah hian rorellai ZPM leh Hmar People’s Convention (HPC) chuan bial awm zawng zawng hi an chuh dawn a. An inremsiam danah chuan ZPM-in bial 8 an chuh ang a, HPC-in bial 4 an chuh ang. Congress pawhin bial zawng zawng an chuh dawn a, MNF chuan HPC (Reformed) nen thawk hovin bial 12 an chuh ang. Hetih lai hian MNF leh Congress party hminga chuh tum hming pelut zingah independent anga chuh an awm bawk a, political party behchhan nei lova independent tak taka chuh an awm bawk.

<><><>

VETY

Animal Husbandry and Veterinary Minister Pu C. Lalsawivunga chuan kum 2023 chhunga Mizoram pawn atanga sa, bawngnhute leh artui chawk luh chu a nawlpui a chhutin cheng vaibelchhe 101 hu vel a nih thu a sawi.

He thu hi vawiina Mizoram sorkar beihpui thlakna, Bana Kaih Policy leh Sorkar laipui hnuai a ran vulhtute chhawmdawlina National Livestock Mission Scheme Mizoram chhunga kaihkawp a nihna tura a khuh hawna hun Aijal Club-a buatsaihah Vety Minister chuan sawiin Mizoram chu sa, artui leh bawngnhute-ah te a la intodelh lo hle a ni a ti a. Nikum, 2023 a state pawn lam atanga Mizoram-in arsa a chawk luh zat chu metric tonne 1,309 a ni a, bawngnhute litre nuai 76, leh artui pum nuai 91 lakluh a nih bawk thu a sawi a. State dang atanga sa, bawngnhute leh artui leina atana Mizoramin sum a hman chu uiawm tham a nih thu sawiin hemi kawnga sumdawna leh eizawna kawng inhawng zau tak awm sa chu Mizoram chhunga

thalai leh hemi lama a ngaihna hriate'n tih tak zeta an buaipui a ngaih thu a sawi bawk.

Pu C. Lalsawivunga chuan Vety Department-in tun hnaiah nasa taka hma a sawn thu leh thalai lehkhathiam leh mi thahnem ngai tak takte'n, ran vulh chu dinchhuahpui mai ni lo in an hausak pui a ni a ti a, hun lo la kal zel turah pawh beiseina eng tak nena ke pen zel tura a duh thu a sawi bawk. Vety Minister chuan Bana Kaih Policy ran vulhtute'n an hlawhtlinpui theih ngeina tur atan Animal Husbandry-a field officer-te chu ran vulhtute harsatna hrethiam tur leh an theihtawp chhuah turin a chah nghal bawk.

Pu C. Lalsawivunga chuan Mizorama ran vultu, a bik takin ar leh vawk vulhtute'n harsatna an tawh len ber chu an ranvulh hralh chhuah kawngah a ni, a ti a, market support leh market linkage tha zawk nen a sokar in hma a lak a pawimawh thu a sawi a ni.

<><><>

DRUGS

Kumin thla 10 kalta chhung khan excise & narcotics department hnathawkte chuan heroin kg. 39 leh gram 18 bakah methamphetamine kg. 122 leh gram 435 an man.

Excise & narcotics department thupuangtu Pu Peter Zohmingthanga chuan heroin leh methamphetamine bakah hian tunlai a Mizoram thalaite'n ruihna atana an hman uar tak tak an man bawk thu a sawi a. Ganja kg. 561 leh gram 725 bakah khuh damdawi (cough syrup), alprazolam, nitrazepam, diazepam leh tramadol thahnem tham tak an man a. Rakzu leh a kaihnawih, zu bilh lai leh dawidim tam tham tak bakah sapzu an tih mai tam tham tak man a tihchhiat a ni bawk a. Narcotic Drugs & Pyschotropic Substances Act, 1985 leh Mizoram Liquor Prohibition Act, 2019 bawhchhetu a puh an mante hi an vaiin mi 6,200 lai an tling a ni.

<><><>

POLLUTANT RIVERS

Aizawl leh chhevel a lui pathumte chu Central Pollution Control Board-in lui tui thianghlim leh thianghlim loh tehfung a siam hmanga endikna-ah, India ram chhunga lui thianghlim lo 300 zingah telh a ni.

He thu hi Akashvani palai hnenah Mizoram Pollution Control Board-a Scientist 'C' Dr. Lalramnghaki Pachuau chuan sawiin Mizorama lui tuite thianghlim leh thianghlim loh chu a sample la a an endik thin thu leh ngun taka tehfung hrang hrang hmanga laboratory-a an endik thin thu a sawi a. Chu'ng an endikna atang chuan Central Pollution Control Board chuan India rama lui tui bawlhhlawh zual BOD level 3 miligram per litre chunglam list 300 chuang a tihchhuah zingah Mizoram a lui pathum Chite, Lawibual leh Tuikual luite chu an tel thu sawiin National Green Tribunal pawhin heng lui tui bawlhhlawh zualte hi a thenfai hna rang taka thawk turin State Sorkarte thu a pe niin a sawi bawk.

Dr. Lalramnghaki Pachuau chuan Mizoram a lui tuite a bawlhhlawh zual zel lohna atan tan lak a ngaihzia sawiin tui hna thianghlim a awm zel theihna tur atan tan lak a pawimawh thu a sawi a. Mihringte chenna khawvel ngaihtuah chung a lui dunga bawlhhlawh leh leivung paih mai lova sorkar dan zam ngaih pawimawh kawnga mitinin hmasawna an neih a pawimawh takzet thu a sawi bawk.

<><><>

NEW TRAIN RESERVATION BOOKING RULES

Rel ticket lak lawk theih hun chhung advance reservation booking rules chu vawiin atang khan hman tan a ni a, dan tharah hian rel ticket lak lawk theih hun, ni 120 ni thin chu ni 60-ah tih tawi a ni a, amaherawchu kumin Oct. ni 31 thlenga ticket lak lawkte chu tih danglam a ni lovang a, ramdang atanga India tlawha zin tumte tana ticket lak lawk theih hun, ni 365 pawh tih danglam a ni lo a ni.

Railways Ministry sawi danin, ticket lak lawk theih hun chhung, ni 60-a tih tlem hian man to zawka hralh leh duh vanga ticket lak lawk vak vak thin ti bovin passenger-te tan ticket tam zawk a awm phah thei dawn a, mi 61 atanga ni 120 chhung atana ticket lak lawk, zaa 21 vel chu a la tu-ten an cancel leh thin tih a tarlang bawk.

<><><>

AIR News on Social Media

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te ngaihthlak leh chhiar theih a dah a ni.

<><><>